



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.368/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët: Violeta Husaj Rugova kryesuese, Hajriz Hoti dhe Bujar Muzaqi anëtarë, duke vendosur përkitazi me ankesën e subjektit politik Lëvizja Vetëvendosje (LVV), me seli në Prishtinë, paraqitur kundër subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, në seancën e panelit të mbajtur më datë 06.02.2025, merr këtë:

V E N D I M

- I. PRANOHET e bazuar ankesa e subjektit politik Lëvizja Vetëvendosje (LVV), me seli në Prishtinë, Anr.368/2025 e datës 04.02.2025
- II. Subjektit politik Lidhja Demokratike e Kosovës (LDK), me seli në Prishtinë, për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet e Përgjithshme për Kuvendin e Republikës së Kosovës që do të mbahen më datë 09.02.2025, i shqiptohet dënimi më gjorbë në lartësi prej 3000(tremijë) euro.
- III. Detyrohet Subjekti politik Lidhja Demokratike e Kosovës (LDK), me seli në Prishtinë, që gjorbën e shqiptuar si në pikën -II-, të dispozitivit të këtij vendimi, ta paguaj në afat prej 15 ditëve, nga dita e plotfuqishmërisë së këtij vendimi.

A r s y e t i m

Me datën 04.02.2025 PZAP-i, ka pranuar një ankesë nga subjekti politik Lëvizja Vetëvendosje (LVV) me seli në Prishtinë, në të cilën pretendohet se me datë 04 Shkurt 2025, Qendra e Lëvizjes Vetëvendosje në Istog, ka identifikuar në profilin në instagram, të kandidatës për deputete nga lista e Lidhjes Demokratike të Kosovës, Serbeze Kabashi Muçaj, një video me tekst shoqërues, të realizuar në hapësirat e brendshme të Qendrës Kryesore për Mjekësi Familjare në Istog në kundërshtim me dispozitat ligjore zgjedhore, duke shfrytëzuar kështu burimet dhe institucionet publike shtetërore për qëllime elektorale. Kandidatja për

deputete Serbeze Kabashi Muqaj me qellim të përfitimit të votave shfrytëzon hapësira të institucioneve publike për të promovuar veten dhe subjektin politik LDK, ku me këtë veprim janë shkelur dispozitat ligjore të nenit 36 paragrafi i LZP-së. Si provë ka bashkangjitur fotografi dhe video në link: <https://www.instagram.com/p/DFObJuOMnQ3/>
Në përgjigjen në ankesë të datës 05.02.2025, të subjektit politik theksohet se pretendimi se kandidatja për deputete znj.Serbeze Kabashi Muqaj ka shkelur nenin 36 paragrafi 1 për Zgjedhjet e Përgjithshme, nuk qëndron sepse e njëjta ka pasur pëlqim për vizitë dhe shfrytëzim të hapësirës të QKMF në Istog, kuptohet pas orarit të punës pa penguar procesin e punës normale që zhvillohet çdo ditë aty.

PZAP-i, pasi që shqyrtoj dhe vlerësoi ankesën gjeti se:

Ankesa është bazuar

Paneli pasi që shqyrtoi pretendimet ankimore dhe përgjigjen në ankesë, ka gjetur se postimi i videos është ende aktiv në llogarinë në instagram të kandidatës për deputete nga radhët e subjektit politik LDK, znj.Serbeze Kabashi Muqaj, dhe ka vërtetuar se njëjta është bërë në hapësirat e brendshme të Qendrës Kryesore të Mjekësisë Familjare. Nga prova materiale e bashkangjitur ankesës, së Subjektit Politik LVV, dhe shkresave tjera të lëndës, paneli ka vlerësuar se nga ana e kandidatës për deputete nga radhët e subjektit politik, Lidhja Demokratike e Kosovës, është shkelur Rregulla Zgjedhore Nr. 07/2024 për Fushatën e Zgjedhjeve, Monitorimin e Fushatës së Zgjedhjeve dhe Deklarimin Financiar, pasi që kandidatja në fjalë, me qëllim të promovimit të numrit në listën me të cilën kandidon për deputete, është regjistruar në hapësirat e brendshme të Qendrës Kryesore të Mjekësisë Familjare, për fushatë zgjedhore, veprim ky i cili bie në kundërshtim edhe me dispozitën e nenit 36 paragrafi 1 i Ligjit NR.08/L-228, për Zgjedhjet e Përgjithshme në Republikën e Kosovës, ku parashihet se *“personi i cili mban pozitë publike i zgjedhur apo i caktuar nuk mund të përdorë atë zyre apo ndonjë nga pasurit e saj me qëllim të përfitimit të votave. Asnjë nga burimet e asnjë institucioni të administratës publike qoftë të nivelit qendror ose lokal ose edhe ndonjë ndërmarrje në zotërim ose të kontrolluar nga autoritetet qendrore ose lokale nuk mund të shfrytëzohet ose të futen në mbështetje të ndonjë subjekti politik në zgjedhje”*. E në paragrafin 3 të Kësaj dispozite përcaktohet se: *me përjashtim të rasteve të parashikuara me ligj, nuk mund të përdoren ose të vihen në mbështetje të subjekteve politike në zgjedhje, burime ose resurse të institucioneve apo organeve publike në nivel qendror ose lokal, apo çdo lloj institucioni tjetër publik.*

Sipas përgjigjes së dhënë në ankesë theksohet se kandidatja për deputete znj. Serbeze Kabashi Muqaj, ka pasur pëlqim për vizitë dhe shfrytëzim të hapësirës të QKMF në Istog, kuptohet pas orarit të punës pa penguar procesin e punës normale që zhvillohet çdo ditë aty. Mirëpo, paneli vlerëson se nga ky pëlqim rezulton se nuk është shënuar saktësisht se cila ishte kjo qendër e Mjekësisë Familjare, vendi dhe adresa e saktë, e në anën tjetër në bazë të nenit 4 par.2 të Rregullores 7/24, përcaktohet se subjektet politike të certifikuara mund të mbajnë tubime në hapësirat publike në institucionet arsimore, sportive dhe kulturore ku nuk pengohet puna e rregullt e tyre dhe pasi që kjo lejohet nga institucioni përkatës dhe KKZ. Çka do të thotë se fjala është për tubime ku duhen hapësirat, ndërsa nuk përfshihen Qendrat e Mjekësisë familjare e aq më pak kur bëhet fjalë për qendrat Kryesore të Mjekësisë Familjare.

Kështu kandidatja në fjalë nga Subjekti Politik LDK, nuk ka pas të drejtë të kërkoj e as të ipet pëlqim për shfrytëzimin e objekteve të tilla. Sipas vlerësimit të panelit konkludohet se kjo video është bërë në hapësirat e brendshme të Qendrës Kryesore të Mjekësisë Familjare, pasi qe gjate prezantimit shihen numri rendor i kandidatës, znj.Serbeze Kabashi Muqaj në listën e subjektit politik, LDK, dhe se kjo video gjatë fushatës zgjedhore është bërë me qëllim të përfitimit të votave. Rrjedhimisht sipas vlerësimit të panelit veprimet e kandidatës për deputete znj.Serbeze Kabashi Muqaj, bie ndesh me dispozitën e nenit 36 paragrafi 1 të LZP-së dhe rregullës zgjedhore 07/2024.

Paneli, me rastin e vendosjes së gjobës si në dispozitiv të këtij vendimi, ka marrë parasysh të gjitha rrethanat si në vijim: natyrën e shkeljes dhe ndikimit të mundshëm të saj në procesin zgjedhor në fjalë, shkallën dhe peshën e shkeljes, se ky veprim. Kjo konsiston në atë se subjekti politik LDK, ka qenë i njoftuar me obligimet dhe përgjegjësit gjatë procesit të fushatës zgjedhore. Paneli me rastin e shqiptimit të gjobës ka pasur parasysh edhe praktikën e mëhershme për rastet për afërsisht të ngjashme.

Nga arsyet e theksuara me lart, e në kuptim të nenit 36 paragrafi 1, neni 118 paragrafi 1, neni 120 paragraf 1 nën paragrafi 1.3, të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa
Anr.368/2025 më datën 06.02.2025

Kryesuese e Panelit
Violeta Husaj Rugova



Këshilla Juridike: Kundër këtij vendimi nuk lejohet ankesa konform nenit 118 par. 4 të LZP-së.